



ევროკავშირი
საქართველოსთვის
ENPARD



CZECH REPUBLIC
DEVELOPMENT COOPERATION



საპარტფლოს
საზოგადოებრივ
სამშობო ინსტიტუტს



საგრანტო კონკურსის სახელმძღვანელო

2021 წლის შემოდგომის საგრანტო კონკურსი

პროექტი: წყალტუბოს ადგილობრივი განვითარების ჯგუფი

“წინამდებარე პუბლიკაცია შექმნილია ევროკავშირის დახმარებით. მის შინაარსზე პასუხისმგებელია „ფიფლ ინ ნიდ“ (PIN) და „წყალტუბოს განვითარების ჯგუფი“ და პუბლიკაციის შინაარსის ევროკავშირის პოზიციად აღქმა დაუშვებელია”.

პროექტს „წყალტუბოს ადგილობრივი განვითარების ჯგუფის“ ფარგლებში 2021 წლის შემოდგომის საგრანტო კონკურსი განხორციელდება 2021 წლის ოქტომბრიდან 2021 წლის დეკემბრის ჩათვლით.

ჩეხური არასამთავრობო ორგანიზაცია „ფიფლ ინ ნიდ“ წყალტუბოს მუნიციპალიტეტში ახორციელებს სოფლის განვითარების პროექტს „ევროპის სამეზობლო პროგრამის სოფლისა და სოფლის მეურნეობის განვითარებისათვის“ (ENPARD) ფარგლებში. ENPARD საქართველოში 2013 წლიდან ხორციელდება. იგი მიზნად ისახავს საქართველოს სოფლის განვითარებას და სოფლის მეურნეობის სექტორის გამოცოცხლებას ხელისუფლებას, სამოქალაქო საზოგადოებასა და სოფლად მცხოვრებ მოსახლეობას შორის მრავალმხრივი თანამშრომლობის პირობებში. პროექტი „წყალტუბოს ადგილობრივი განვითარების ჯგუფი“ ამ პროგრამის III ფაზის ფარგლებში არის დაფინანსებული და მას ახორციელებს ორგანიზაცია PIN პარტნიორ ორგანიზაცია „საქართველოს საზოგადოებრივ საქმეთა ინსტიტუტთან“ (GIPA) ერთად. ასევე, პროექტის ფინანსური მხარდამჭერია ჩეხეთის რესპუბლიკის განვითარების სააგენტო (CzDA).

აღნიშნული პროექტის ფარგლებში „ფიფლ ინ ნიდ“ აცხადებს ღია საგრანტო კონკურსს 2021 წლის ოქტომბერში. წინამდებარე დოკუმენტი კი წარმოადგენს საგრანტო სახელმძღვანელოს ყველა დაინტერესებული პირისთვის, რომელთაც ექნებათ სურვილი, მიიღონ დეტალური ინფორმაცია გამოცხადებული საგრანტო კონკურსის შესახებ.

კონკურსის მიზანია „წყალტუბოს განვითარების ჯგუფის“ (LAG) მიერ შემუშავებული „წყალტუბოს ადგილობრივი განვითარების სტრატეგია 2020-2024-ით“ განსაზღვრული პრიორიტეტებისა და მიზნების შესაბამისად, წყალტუბოში ცხოვრების ხარისხის და სოციალურ-ეკონომიკური მდგომარეობის გაუმჯობესება.

საგრანტო კონკურსი მოიცავს მთლიანად წყალტუბოს მუნიციპალიტეტის ადმინისტრაციულ-ტერიტორიულ ფარგლებს. კონკურსის ფარგლებში საპროექტო განაცხადების დაფინანსება მოხდება „წყალტუბოს ადგილობრივი განვითარების

ჯგუფის“ მიერ შემუშავებულ „წყალტუბოს ადგილობრივი განვითარების სტრატეგია 2020-2024-ში“ ასახული სტრატეგიული მიზნების და ამოცანების პრიორიტეტების გათვალისწინებით. პროექტის ფარგლებში დაფინანსდება საჯარო, სათემო და ბიზნეს ინიციატივები. ყველა პროექტს მოეთხოვება ფულადი თანადაფინანსება.

მნიშვნელოვანი ინფორმაცია 2021 წლის შემოდგომის საგრანტო კონკურსისათვის

პროექტ „წყალტუბოს ადგილობრივი განვითარების ჯგუფის“ ფარგლებში საგრანტო კონკურსი და შერჩევის პროცესი განხორციელდება 2021 წლის ოქტომბრიდან 2021 წლის დეკემბრის ჩათვლით. კონკურსის ფარგლებში მხარდაჭერილი საგრანტო პროექტები ფუნქციონირებადი უნდა იყოს საგრანტო ხელშეკრულების ხელმოწერიდან მაქსიმუმ 12 თვის ვადაში.

2021 წლის საგრანტო კონკურსით დაინტერესებულმა ყველა პირმა მხედველობაში უნდა მიიღოს ამოცანების კლასიფიკაცია პოსტ-COVID-19-ის პერიოდის განმავლობაში (2021), რომელიც მოცემულია დოკუმენტში - “წყალტუბოს ადგილობრივი განვითარების სტრატეგია 2020-2024”, გვერდი 28-30. პროექტების შეფასებისას, თანაბარი ქულების შემთხვევაში, მხარდაჭერისათვის უპირატესობა მიენიჭება იმ პროექტებს, რომლებიც პასუხობენ უფრო მაღალი „პრიორიტეტულობის დონის“ მქონე ამოცანებს. დოკუმენტი ხელმისაწვდომია „წყალტუბოს ადგილობრივი განვითარების ჯგუფის“ ვებ-გვერდზე: www.tsqaltubolag.ge.

პრიორიტეტი მიენიჭება პროექტებს, რომლებიც მიზნად ისახავს რამდენიმე სექტორის თანამშრომლობას: თანამშრომლობა ეკონომიკურ სექტორებს შორის (მაგალითად - ტურიზმისა და სოფლის მეურნეობის სექტორებს შორის), საჯარო და კერძო სექტორებს შორის.

COVID-19-ის პანდემიასთან დაკავშირებული რისკებიდან გამომდინარე, საგრანტო კონკურსთან დაკავშირებული რიგი აქტივობები, როგორებიცაა საინფორმაციო შეხვედრები, საგრანტო კონსულტაციები და ტრენინგები პროექტის შედგენაზე, შესაძლოა განხორციელდეს დისტანციურად, სხვადასხვა ინტერნეტ-ტექნოლოგიების გამოყენების საშუალებით. აღნიშნულის შესახებ ინფორმაცია გამოქვეყნდება „წყალტუბოს ადგილობრივი განვითარების ჯგუფის“ ოფიციალურ ვებ-გვერდსა და ფეისბუქ გვერდზე.

2021 წლის შემოდგომის საგრანტო კონკურსის განსაკუთრებული პირობები:

- ყველა წარმოდგენილი პროექტი უნდა აკმაყოფილებდეს COVID-19-ის ეპიდემიოლოგიური რისკის შემცირების სტანდარტებს საქმიანობის სფეროების შესაბამისად (ნათლად უნდა იყოს აღწერილი საპროექტო განაცხადში).
- მიმდინარე საგრანტო კონკურსში თუ ერთი ოჯახიდან წარდგენილი იქნება ერთზე მეტი განაცხადი, და ოჯახიდან ერთზე მეტი აპლიკანტი გადალახავს შერჩევის პირველ ეტაპს, ოჯახის წევრებმა უნდა შეარჩიონ მხოლოდ ერთი

პროექტი შემდეგ ეტაპზე გადასასვლელად. იგივე ოჯახიდან წარდგენილი სხვა საპროექტო განაცხადი შეიძლება ხელახლა იქნას წარდგენილი საგრანტო კონკურსის მომავალ რაუნდებში.

- პრიორიტეტი მიენიჭება იმ პროექტებს, რომლებიც მიზნად ისახავს:
 - სოციალური სერვისების განხორციელებასა და/ან გაფართოებას;
 - სოფლის მეურნეობის პროდუქტების შენახვისა და/ან გადამამუშავების ხელშეწყობას, სახელმწიფო რეგულაციების მოთხოვნების გათვალისწინებით.
 - ბიზნეს სტარტაპების განხორციელებას
 - მოწყვლადი ჯგუფების (დევენილები, ეკომიგრანტები, მაღალმთიან ზონაში მცხოვრები პირები, შეზღუდული შესაძლებლობების მქონე პირები) სოციალურ-ეკონომიკური პირობების გაუმჯობესებასა და მათ მეტ ინტეგრაციას საზოგადოებაში. ასევე, აღნიშნული ჯგუფების ბიზნეს პროექტებს შერჩევის პროცესში მიენიჭება უპირატესობა
 - ინოვაციური ბიზნეს პროექტების განხორციელებას (ტექნოლოგიური ან/და პრაქტიკული კუთხით)
- ყველა მხარდაჭრილი პროექტის განხორციელების გეგმა შემუშავდება ინდივიდუალურად და საგრანტო ხელშეკრულებების დაიდება შესაბამისი გეგმის მიხედვით.

დასაშვები საპროექტო მიმართულებების მაგალითები

გამოცხადებული საგრანტო კონკურსის ფარგლებში, შესაძლებელია მოხდეს შემდეგი საპროექტო განაცხადების მიღება:

- პროექტები, რომლებიც ხელს უწყობენ ადგილობრივ დონეზე სასურსათო უსაფრთხოების უზრუნველყოფას, პირველად წარმოებაში ინვესტირების გზით;
- სოფლის მეურნეობის თანამედროვე და საუკეთესო პრაქტიკების განხორციელების მხარდაჭერა;
- აგრო ტურისტული სერვისების განვითარების მხარდაჭერა;
- მეღვინეობაში ახალი ტექნოლოგიებისა და აღჭურვილობის დანერგვა;
- ფუტკრის მრავალგვარი პროდუქტის წარმოების მხარდაჭერა;
- იმ საწარმოების მხარდაჭერა, რომლებიც ტურიზმთან დაკავშირებულ პროდუქციას ქმნიან (სუვენირები, ბრენდირებული ნივთები და ა.შ.);
- არსებული სოციალური სერვისების ხარისხის გაუმჯობესება ან ახალი სასიცოცხლო მნიშვნელობის სერვისების შექმნის მხარდაჭერა ცენტრიდან დაშორებულ სოფლებში (მაგალითად: შინ მოვლის სერვისი);

- არსებული საყოფაცხოვრებო სერვისების ხარისხის გაუმჯობესება ან ახალი სასიცოცხლო მნიშვნელობის სერვისების შექმნის მხარდაჭერა ადმინისტრაციულ ცენტრიდან დაშორებულ სოფლებში;
- მოწყვლადი ჯგუფების (დევენილები, ეკომიგრანტები, შშმ პირები, მაღალმთაში მცხოვრები პირები) ცხოვრების ხარისხის გაუმჯობესებაზე მიმართული სოციალური და საზოგადოებრივი სერვისების დანერგვა/მხარდაჭერა;
- სპორტული და დასასვენებელი სივრცეების მოწყობა/გაუმჯობესება ადმინისტრაციულ ცენტრიდან დაშორებულ სოფლებში;
- მასშტაბური კულტურული/სპორტული აქტივობების განსახორციელებლად მატერიალურ-ტექნიკური ბაზის გაუმჯობესება;
- კულტურულ-შემეცნებითი ღონისძიებების ორგანიზება ცენტრიდან დაშორებულ სოფლებში (გრძელვადიანი);
- ბიო წარმოების პრაქტიკაში დანერგვის მხარდაჭერა;
- ბიზნესსა და შინამეურნეობებში ენერგოეფექტური მიდგომების დანერგვის მხარდაჭერა;
- ეკოლოგიაზე ორიენტირებული ინოვაციური ტექნოლოგიების დანერგვა ბიზნესში;
- სოციალური საწარმოების შექმნის მხარდაჭერა;
- სათავგადასავლო და ექსტრემალური ტურიზმის სერვისების განვითარების მხარდაჭერა (ველო, ჯომარდობა, ზიპ-ლაინი და ა.შ.);
- სასოფლო-სამეურნეო პროდუქტების შენახვის, გადამუშავების, ბრენდინგის ხელშეწყობა, სახელმწიფო რეგულაციების მიხედვით;
- ინოვაციური ტურისტული სერვისების შექმნა;
- სოფლის მეურნეობის სხვადასხვა სერვისების დანერგვის და განვითარების მხარდაჭერა;
- პირველადი და ინოვაციური სოფლის მეურნეობის პროდუქტების წარმოების მხარდაჭერა;
- განსაკუთრებული პრიორიტეტულობით მოსარგებლო პროექტები ან/და ჯგუფები

საგრანტო კონკურსის ეტაპები, ვადები და განცხადების შერჩევა/შეფასების პროცესი.

საინფორმაციო კამპანია

საგრანტო განაცხადების მიღებამდე განხორციელდება ღონისძიებები, რომლებიც უზრუნველყოფს ინფორმაციის მაქსიმალურად გავრცელებას წყალტუბოს

მუნიციპალიტეტში. საინფორმაციო კამპანიის დროს, მოხდება საგრანტო კონკურსის შესახებ ზოგადი ინფორმაციის მიწოდება შემდეგი საშუალებებით: „წყალტუბოს ადგილობრივი განვითარების ჯგუფის“ ვებ-გვერდი, სოციალური მედია, საინფორმაციო ხასიათის პოსტერები, საინფორმაციო ხასიათის მოკლე ტექსტური შეტყობინებები, სატელეფონო ცხელი ხაზი. საინფორმაციო კამპანიის მიმდინარეობისას სამუშაო დღეების პერიოდში იმუშავებს ცხელი ხაზი-595 79 23 00 (10.00-დან 18.00 სთ-მდე).

საინფორმაციო პოსტერები განთავსდება ყველა სოფელში და ქალაქ წყალტუბოში. საგრანტო კომპონენტით დაინტერესებული პირები უნდა გაეცნონ წყალტუბოს ადგილობრივი განვითარების სტრატეგიას და მასში ასახულ პრიორიტეტულ მიზნებსა და ამოცანებს.(გვერდი: 28-30).

დაწვრილებითი ინფორმაცია საგრანტო კონკურსის პირობების შესახებ და მასთან დაკავშირებული დოკუმენტები, ასევე, განთავსდება „ფიფლ ინ ნიდის“ ვებ- გვერდზე www.pin.ge; „წყალტუბოს ადგილობრივი განვითარების ჯგუფის“ Facebook-ის გვერდზე: (LAG Tskaltubo - წყალტუბოს განვითარების ჯგუფი) და ვებ-გვერდზე : www.tskaltubolag.ge

საგრანტო კონკურსში მონაწილეობა

ნებისმიერ საჯარო და იურიდიულ პირს (კომერციული და არაკომერციული ორგანიზაციები) და 18 წელს მიღწეულ საქართველოს მოქალაქე ფიზიკურ პირებს შეუძლიათ მიიღონ მონაწილეობა საგრანტო კონკურსში (ქვემოთ ჩამოთვლილი შეზღუდვებისა და რეგულაციების გათვალისწინებით), იმ პირობით, რომ ყველა წარდგენილი პროექტი განხორციელდება წყალტუბოს მუნიციპალიტეტში და განმცხადებელი თანხმდება თანადაფინანსების მოთხოვნის პირობებს. პროექტების შეფასების დროს, მსგავსი ქულების შემთხვევაში, პრიორიტეტი მიენიჭება წყალტუბოს მუნიციპალიტეტში მუდმივად მაცხოვრებელი პირის პროექტს.

კონკურსში მონაწილეობის უფლება არ აქვთ:

- პოლიტიკურ პარტიებს,
- რელიგიურ ორგანიზაციებს,
- ფინანსურ ინსტიტუტებს (ბანკი, მიკროსაფინანსო ორგანიზაცია, ლომბარდი და ა.შ),
- ორგანიზაციებს, კავშირებს, გაერთიანებებს, საინიციატივო ჯგუფებს და ა.შ. რომლებიც სქესის, რელიგიური შეხედულებების, ეთნიკური წარმომავლობის და სექსუალური ორიენტაციის საფუძველზე ახდენენ ფიზიკური პირების ან/და კონკრეტული ჯგუფების დისკრიმინაციას,

- უცხო ქვეყნის მოქალაქეებს; (შესაძლოა დაიშვას უცხოური პარტნიორი ორგანიზაციის განაცხადები. ასეთ შემთხვევაში თითოეული აპლიკაციის განიხილვა მოხდება ინდივიდუალურად.),
- „ფიფლ ინ ნიდისა“ და “GIPA-ს” თანამშრომლებს და მათი ოჯახის წევრებს.

განმცხადებლების კატეგორიები და სავალდებულო მინიმალური თანადაფინანსების მოთხოვნა

პროექტის ტიპი	შესაძლო განმცხადებელი	მოთხოვნილი ფულადი თანამონაწილეობა
საჯარო პროექტები	საჯარო სამართლის იურიდიული პირები, ადგილობრივი თვითმმართველობისა და მმართველობის ორგანოები; მუნიციპალიტეტის ტერიტორიაზე არსებული(ა)იპ-ები და სხვა საჯარო სტრუქტურები, ასევე, საგანმანათლებლო ინსტიტუტები.	პროექტის მთლიანი ბიუჯეტის მინიმუმ 10%. აუცილებელია, დადასტურებულ იქნას ხელმოწერილი დოკუმენტით. ამასთანავე, განმცხადებელმა უნდა წარმოადგინოს დოკუმენტი, რომ პროექტი უკვე არ არის გათვალისწინებული თავისივე დამტკიცებულ ბიუჯეტში.
სათემო პროექტები	მოქალაქეთა ჯგუფები, სამოქალაქო საზოგადოების აქტორები/ ორგანიზაციები (ააიპ), საინიციატივო ჯგუფები(მინიმუმ 3 ადამიანისგან შემდგარი), რომლებიც განახორციელებენ	პროექტის მთლიანი ბიუჯეტის მინიმუმ 10%. აუცილებელია, დადასტურებული იქნას ხელმოწერილი დოკუმენტით.

	<p>პროექტს წყალტუბოს მუნიციპალიტეტში.</p>	
<p>ბიზნეს პროექტები</p>	<p>საქართველოში რეგისტრირებული იურიდიული პირები (შპს, სპს, სსდაა.შ) როგორც არსებული მცირე ბიზნესის წარმომადგენლები (ორგანიზაცია, რომელსაც 15 თანამშრომელზე ნაკლები ყავს დასაქმებული), ასევე, ინდივიდუალური პირები ან პირთა ჯგუფები, რომლებიც მზად არიან, დაფინანსების მიღების შემთხვევაში, დაარეგისტრონ ბიზნეს საქმიანობა საქართველოს კანონმდებლობის შესაბამისად. ასევე, რეგისტრირებული სტატუსის მქონე სასოფლო-სამეურნეო კოოპერატივები. ასევე, ორგანიზაციებს, რომლებიც ახორციელებენ მოგებაზე ორიენტირებულ პროექტებს (სოციალური მეწარმეობა).</p>	<p>პროექტის მთლიანი ბიუჯეტის მინიმუმ 30%.</p> <p>სტარტაპებისათვის, რომელთა საერთო ბიუჯეტი არ აღემატება 8000 ევროს ექვივალენტს ლარში მინიმუმ 15%.</p> <p>მოწყვლადი ჯგუფებისათვის (დევნილები, ეკომიგრანტები, მაღალმთიან ზონაში მცხოვრები პირები და შეზღუდული შესაძლებლობების მქონე პირები) პროექტის მთლიანი ბიუჯეტის მინიმუმ 15%.</p> <p>მოწყვლადი ჯგუფების (დევნილები, ეკომიგრანტები, მაღალმთიან ზონაში მცხოვრები პირები და შეზღუდული შესაძლებლობების მქონე პირები) სტარტაპებისათვის, რომელთა საერთო ბიუჯეტი არ აღემატება</p>

		5000 ევროს ექვივალენტს ლარში მინიმუმ 5%
--	--	---

თანამონაწილეობად ჩაითვლება მხოლოდ საგრანტო კონკურსში გამარჯვებულ მონაწილესთან ხელშეკრულების ხელმოწერის შემდეგ დახარჯული თანხა. ბენეფიციარმა უნდა წარმოადგინოს საპროექტო განაცხადის ბიუჯეტის საკუთარი თანამონაწილეობის შესაბამისად განხორციელებული შესყიდვების დამადასტურებელი დოკუმენტაცია.

საბოლოო ეტაპზე გასული ყველა პროექტის ავტორთან ინდივიდუალურად შეთანხმდება და გაიწერება თანადაფინანსების ვალდებულება დროში. აქვე, აუცილებლად იქნება გათვალისწინებული პროექტის რიგი საჭიროებები და თავისებურებები.

საგრანტო დაფინანსების ოდენობა

„ფიფლ ინ ნიდისგან“ მოთხოვნილი თანხა უნდა იყოს € 1000-დან € 15000-მდე (ექვივალენტი ლარში). გამონაკლის შემთხვევებში, მიმდინარე საგრანტო კონკურსის ფონდების ხელმისაწვდომობისა და პროექტის სტრატეგიული მნიშვნელობის გათვალისწინებით (მაგალითად, თუ პროექტი ემსახურება რამდენიმე სექტორის განვითარება/თანამშრომლობას), „ფიფლ ინ ნიდმა“ შესაძლოა განიხილოს გრანტის მოცულობის გაზრდა.

რაც შეეხება სამოქალაქო საზოგადოების ორგანიზაციებს, მხოლოდ მათ, რომლებსაც ბოლო 5 წლის განმავლობაში წარმატებულად აქვთ განხორციელებული მინიმუმ სამი საგრანტო პროექტი, გააჩნიათ გრანტის მართვის გამოცდილება და დამტკიცებული ფინანსური აღრიცხვის სისტემა და მექანიზმი, შეუძლიათ, მოითხოვონ €30 000-მდე (ექვივალენტი ლარში) დაფინანსება. ყველა სხვა სამოქალაქო საზოგადოების ორგანიზაციებს შეუძლიათ პროექტისათვის მოითხოვონ დაფინანსება €5 000-მდე (ექვივალენტი ლარში), როგორც პირდაპირი დაფინანსებით, ასევე საწარმო საშუალებების შეძენით (დეტალური ინფორმაციისათვის იხ. თავი „საგრანტო ხელშეკრულება და შესყიდვები“).

სრული განაცხადის შემოტანისას, სამოქალაქო საზოგადოების ორგანიზაციებმა უნდა წარმოადგინონ:

- განხორციელებული პროექტების დასახელებები, დონორთა დაფინანსებები და დონორთა სია; პროექტის პარტნიორების სარეკომენდაციო წერილები; უკვე

განხორციელებული პროექტების შესახებ, ნებისმიერი ფორმით; კვლევები, შეფასებები (ასეთის არსებობის შემთხვევაში).

- განმცხადებლებს მოეთხოვებათ წარმოადგინონ დოკუმენტაცია/ინფორმაცია მათი პროცედურების, პოლიტიკის და სხვა იმ საშუალებების შესახებ, რომლითაც ორგანიზაცია აკონტროლებს თავისი ფინანსური რესურსების მიმართულებას, გამოყოფასა და გამოყენებას.

დაუშვებელი ხარჯები, მათ შორის, განმცხადებლის თანადაფინანსების ნაწილში:

- ვალების/სესხების დაფარვა;
- ხარჯები, რომლებიც დაკავშირებული არაა საგრანტო პერიოდთან (ხელფასები/ჰონორარი და სხვა მიმდინარე ხარჯები);
- უკვე აღებული ვალდებულებების დაფინანსება (მაგ. სხვა წყაროდან უკვე დაფინანსებული ვალდებულებების დაფინანსება);
- ინდივიდუალური ხარჯები (მაგ. საგანმანათლებლო და სამოგზაურო ხარჯები).
- არაკაპიტალური, არასაინვესტიციო ხარჯები (ხარჯები, რომელიც აუცილებელია ბიზნესის განხორციელების ეტაპზე მუდმივად მაგ. სახარჯი მასალები)
- უძრავი ქონების შეძენა; სასწავლო/სამეცნიერო გრანტები (გარდა სპეციფიკური საჭიროების პროფესიული კურსების);
- ხელფასები (გამონაკლის შემთხვევაში შესაძლოა დაფინანსდეს ექსპერტის/სპეციალისტის ჰონორარი);
- მიმდინარე ხარჯები (იჯარა, კომუნალური ხარჯები და სხვა ყოველდღიური ხარჯები, რომლებიც გამოიყენება ბიზნესის ფუნქციონირებისათვის საშუალოდ ერთი წლის განმავლობაში) /საბრუნავი საშუალებები;

“ფიფლ ინ ნიდ-ისგან” მოთხოვნილი თანხებით არ ფინანსდება შემდეგი ხარჯები (შესაძლებელია გათვალისწინებული იქნას განმცხადებლის თანადაფინანსების ნაწილში):

- მსხვილფეხა და წვრილფეხა რქოსანი პირუტყვის, შინაური ცხოველის/ფრინველების შეძენა,
- სემინარებში, სამუშაო შეხვედრებში და კონფერენციებში ინდივიდუალური მონაწილეობა;
- აკადემიური და სამეცნიერო კვლევები;

- ნებისმიერი პროექტი, რომელიც გულისხმობს მხოლოდ ერთჯერადი საქმიანობის განხორციელებას, მათ შორის, ტრენინგს;
- ჰუმანიტარული აქციები და საქმიანობა;
- ზარალი, გამოწვეული სავალუტო კონვერტაციის შედეგად;
- სადაზღვევო ხარჯები;
- სალიცენზიო და სანებართვო მოსაკრებელი
- სარემონტო მასალები და მომსახურება;
- მშენებლობა (გამონაკლისია სათბურების მშენებლობა მაღალმთიანი ზონაში, რომელიც შესაძლებელია ასევე იქნას მოთხოვნილი პინისაგან. რადგანაც სოფლის მეურნეობის განვითარება იდენტიფიცირებულია პრიორიტეტულად ადგილობრივი განვითარების სტრატეგიის დოკუმენტში);

წყალტუბოს ადგილობრივი განვითარების ჯგუფის პროექტების შეფასების კომისია

პირველადი და სრული საპროექტო განაცხადების განხილვა და შეფასება მოხდება „წყალტუბოს ადგილობრივი განვითარების ჯგუფის“ პროექტების შეფასების კომისიის წევრების და ტექნიკური ექსპერტების მიერ. ტექნიკური ექსპერტები წარმოდგენილი იქნებიან განმახორციელებელი ორგანიზაციიდან და საჭიროებისამებრ, დამატებით მოიწვევა ექსპერტები კონსულტაციების გასაცემად. ტექნიკური ექსპერტების ჩართვის მიზანია, მხარდაჭერა აღმოუჩინონ „წყალტუბოს ადგილობრივი განვითარების ჯგუფის“ პროექტების შეფასების კომისიას 2021 წლის შემოდგომის საგრანტო კონკურსის პროექტების შეფასების პროცესში. კონკრეტულად კი ეს ჩართულობა მიზნად ისახავს, გამოცდილების გაზიარების მიზნით, პროექტების შეფასების წევრების გაძლიერებას. ამასთანავე, „ფიფლ ინ ნიდ“ უზრუნველყოფს პროექტების შესაბამისობას დონორის მოთხოვნებთან.

წყალტუბოს განვითარების ჯგუფის (LAG) პროექტების შეფასების კომისია არის დროებითი ორგანო, რომელიც ირჩევა გარკვეული დროის განმავლობაში საგრანტო კომპონენტის განხორციელებასთან დაკავშირებით. კომისიის წევრები არჩეულნი არიან „წყალტუბოს ადგილობრივი განვითარების ჯგუფის“ წევრების მიერ 2021 წლის ბოლომდე. ამჟამად კომისიაში 12 მოქმედი წევრია.

ინტერესთა კონფლიქტის შემთხვევაში ანუ თუ კომისიის წევრი ან მისი ოჯახის წევრი იღებს სარგებელს ან ფიქსირდება მათი ინტერესები განსახილველ პროექტთან მიმართებაში, ასეთ შემთხვევაში აღნიშნული წევრი არ მონაწილეობს შეფასების პროცესში და ასევე, გაეთიშება პროექტების შეფასების მთლიან რაუნდს. მისი შეფასების უფლება, საჭიროების შემთხვევაში, გადაეცემა მოწვეულ

არადაინტერესებულ/ნეიტრალურ პირს, რომელსაც მხოლოდ ამ მიზნით მოიწვევს „ფიფლ ინ ნიდი“. ოჯახის წევრად განიხილება: მეუღლე, შვილები, მშობლები, ბებია-ბაბუა, შვილიშვილები, და-ძმა, მასთან მუდმივად მაცხოვრებელი ნებისმიერი პირი;

თუ კომისიის წევრის მეგობარი, ნათელ-მირონი ან ნათესავი (ზემოთაღნიშნული ოჯახის წევრების გარდა) მიიღებს მონაწილობას საგრანტო კონკურსში, ასეთ დროს, კომისიის წევრი ვალდებულია შეატყობინოს „ფიფლ ინ ნიდს“ და განაცხადოს ინტერესთა კონფლიქტის შესახებ. კერძოდ, ასეთ შემთხვევაში, კომისიის წევრი არ აფასებს მხოლოდ ამ კონკრეტულ პროექტს და ჩართულია სხვა პროექტების შეფასებაში. თუ კომისიის წევრი არ შეატყობინებს მსგავსი შემთხვევის შესახებ პროექტის განმახორციელებელ ორგანიზაციას და არ მოხდება ინტერესთა კონფლიქტის დაფიქსირება, LAG-ის მიერ მიიღება შემდეგი ზომები: ინფორმაცია მიეწოდება წევრთა საერთო კრებას, დაუყოვნებლივ მოხდება კომისიის წევრის დათხოვნა კომისიიდან და ასევე, დადგება ამ პირის LAG-ის წევრობის საკითხი.

კომისიის წევრი, ასევე, არ შეაფასებს თავისი ინსტიტუციის/სამუშაო დაწესებულების მიერ წარმოდგენილ პროექტს და ასევე, გაეთიშება პროექტების შეფასების მთლიან რაუნდს. მისი შეფასების უფლება კი საჭიროების შემთხვევაში, გადაეცემა მოწვეულ არადაინტერესებულ/ნეიტრალურ პირს, რომელსაც მხოლოდ ამ მიზნით მოიწვევს ორგანიზაცია „ფიფლ ინ ნიდი“.

გასათვალისწინებელია ის ფაქტიც, რომ ორგანიზაცია „ფიფლ ინ ნიდ“, როგორც პროექტის განმახორციელებელი ორგანიზაცია, სარგებლობს უფლებით განსაზღვროს თუ რამდენად შეესაბამება საპროექტო განაცხადი დონორთა მოთხოვნებს და მიიღოს საბოლოო გადაწყვეტიება გრანტის გაცემასთან დაკავშირებით.

საგრანტო კონკურსის ეტაპები და ვადები, შეფასების პროცესი

პროექტს „წყალტუბოს ადგილობრივი განვითარების ჯგუფის“ ფარგლებში 2021 წლის შემოდგომის საგრანტო კონკურსი განხორციელდება 2021 წლის ოქტომბრიდან 2021 წლის დეკემბრის ჩათვლით. კონკურსის ფარგლებში მხარდაჭერილი პროექტები ფუნქციონირებადი უნდა იყოს არაუგვიანეს 2022 წლის ოქტომბერში (უნდა ეწეოდეს მომსახურებას ან/და აწარმოებდეს შესაბამის პროდუქციას). გთხოვთ, დეტალურად გაეცანით ქვემოთ მოცემულ ინფორმაციას:

I ეტაპი:	იდეების დაფიქსირება ცხელი ხაზის მეშვეობით და პირველადი კონსულტაცია
II ეტაპი:	პირველადი საპროექტო განაცხადების წარდგენა;

III ეტაპი:	პირველადი საპროექტო განაცხადების შეფასება;
IV ეტაპი:	ტრენინგი სრული საპროექტო განაცხადის დასაწერად;
V ეტაპი:	სრული საპროექტო განაცხადების წარდგენა და შეფასება;
VI ეტაპი:	შერჩეულ განმცხადებლებთან გასაუბრება და სავსე მონიტორინგი;
VII ეტაპი:	საბოლოო გადაწყვეტილება და საგრანტო ხელშეკრულების ხელმოწერა

I ეტაპი: ვიდეო კონსულტაციები პირველადი საპროექტო განაცხადების მოსამზადებლად.

პირველ ეტაპზე, პოტენციური განმცხადებლები სასურველია ყურადღებით გაეცნონ წყალტუბოს ადგილობრივი განვითარების ჯგუფის ვებ გვერდზე განთავსებულ ვიდეო კონსულტაციებს, რომლებშიც დეტალურად არის ახსნილი თუ როგორ უნდა მოხდეს პირველადი საპროექტო განაცხადის შევსება. კითხვების შემთხვევაში განმცხადებლებს შეუძლიათ დაუკავშირდნენ პროექტის განმახორციელებელ გუნდს ცხელი ხაზის ნომერზე - 595 79 23 00, რომელსაც მოემსახურება „ფიფლ ინ ნიდის“ თანამშრომელი, ორშაბათიდან პარასკევის ჩათვლით 10:00 დან 18:00 საათამდე. აღნიშნული ცხელი ხაზი იმუშავებს პირველადი საპროექტო განაცხადების მიღების პარალელურად 2021 წლის 1 ოქტომბრიდან 2021 წლის 13 ოქტომბრის ჩათვლით სამუშაო დღეებში, 10:00 საათიდან 18:00 საათამდე.

II ეტაპი: პირველადი საპროექტო განაცხადის წარდგენა:

კონკურსის შემდგომ ეტაპზე, საგრანტო კონკურსში მონაწილეობის მსურველები წარადგენენ საპროექტო იდეის პირველად განაცხადს (დანართები 3, 5, 7 საპროექტო განაცხადის ტიპის მიხედვით) მხოლოდ ელექტრონული ფორმით pdf ფორმატში, ელექტრონულ მისამართზე lagtskaltubogrants@gmail.com 2021 წლის 1 ოქტომბრიდან 2021 წლის 13 ოქტომბრის ჩათვლით, 18:00 საათამდე, თბილისის დროით. აპლიკაციის ფორმა უნდა იყოს შევსებული ნაბეჭდი ფორმით. ვადის გასვლის შემდეგ, მიღებული განაცხადები არ განიხილება!

პროექტის პირველადი სააპლიკაციო ფორმა შესაძლებელია ჩამოტვირთოთ „წყალტუბოს ადგილობრივი განვითარების ჯგუფის“ ვებ-გვერდიდან: www.tskaltubolag.ge

განაცხადი გაეთიშება საგრანტო კონკურსს, თუ:

- პროექტი განხორციელდება წყალტუბოს მუნიციპალიტეტის ფარგლებს გარეთ;
- განმცხადებელი არ არის საქართველოს კანონმდებლობის შესაბამისად რეგისტრირებული ფიზიკური ან იურიდიული პირი;
- განაცხადში გამოტოვებულია/შეუვსებელია რომელიმე პუნქტი;
- არ არის დაცული სიტყვების მინიმალური რაოდენობა;
- განაცხადში ზუსტად არ არის მითითებული „წყალტუბოს ადგილობრივი განვითარების სტრატეგიის“ პრიორიტეტების დოკუმენტიდან სტრატეგიული მიზანი და პრიორიტეტული ამოცანა (ზუსტი ციტირება დოკუმენტიდან);
- განმცხადებელი არ იღებს ვალდებულებას აუცილებელ მინიმალურ თანადაფინანსებაზე;
- პროექტი არის პოლიტიკური ან რელიგიური ნიშნით მიკერძოებული;
- პროექტი აყენებს ზიანს გარემოს (ყველა პროექტი უნდა შეიცავდეს გარემოზე მოსალოდნელი ზეგავლენის ანალიზს);
- ეწინააღმდეგება 2021 წლის შემოდგომის საგრანტო კონკურსის სხვა მნიშვნელოვან პირობებს.

III ეტაპი: პირველადი საპროექტო განაცხადის შეფასება:

საპროექტო იდეის პირველადი განაცხადის წარდგენის შემდეგ, წყალტუბოს განვითარების ჯგუფის პროექტების შეფასების კომისიის, ასევე, ტექნიკური ექსპერტების მიერ მოხდება მისი შედარება წყალტუბოს ადგილობრივი განვითარების სტრატეგიისა და საგრანტო კონკურსის ძირითად მოთხოვნებთან (იხილეთ პირველადი საპროექტო განაცხადის შეფასების ფორმა და კრიტერიუმები, დანართები 2, 4, 6). ყველა პირველადი განაცხადი, რომელიც კრიტერიუმებს შეესაბამება და გადალახავს ქულების მინიმალურ ზღვარს, დაშვებული იქნება შემდგომ - სრული საპროექტო განაცხადის მომზადების ეტაპზე.

ყურადღება: არასრული განაცხადების მიღება არ დაიშვება! ორი ერთგვაროვანი/ (მსგავსი) ქულების მქონე პროექტის შეფასებისას უპირატესობა მიენიჭება იმ პროექტს, რომელიც წარმოდგენილია წყალტუბოში მუდმივად მცხოვრები განმცხადებლის მიერ.

ყველა პირველადი საპროექტო განაცხადი დამოუკიდებლად შეფასდება სულ მცირე 3 წევრის მიერ, რომლებიც თავისმხრივ, წარმოადგენენ შეფასების კომისიის წევრებსა და „ფიფლ ინ ნიდის“ ტექნიკურ ექსპერტებს (საჭიროების შემთხვევაში მოხდება დამატებითი ექსპერტების დაქირავება შეფასების კომისიისთვის რეკომენდაციების შესამუშავებლად)

იმ შემთხვევაში, თუ პირველადი საპროექტო განაცხადი შეფასებისას მიიღებს მინიმალურ 50% -ზე ნაკლებ ქულას, ის აღარ გადადის შემდეგ ეტაპზე, ანუ აღარ ხდება მისი წარდგენა სრული საპროექტო განაცხადის მოსამზადებლად.

პირველადი საპროექტო განაცხადების ყველა ავტორი ინფორმირებულნი იქნებიან შეფასების შედეგების შესახებ, სატელეფონო ზარის ან ელექტრონული ფოსტის მეშვეობით. შეფასების კომისიის მიერ შერჩეული განაცხადების ავტორები მოწვეულნი იქნებიან შემდეგ ეტაპში მონაწილეობის მისაღებად და მათ ეცნობებათ ტრენინგების განრიგი. იმ შემთხვევაში, თუ რომელიმე განმცხადებელთან ვერ მოხერხდა სატელეფონო კავშირი, მათთან მოხდება დაკავშირება ელექტრონული ფოსტის საშუალებით.

მონაწილეებს, რომელთა განაცხადებმაც ვერ გადალახეს კონკურსის პირველი ეტაპი, შეუძლიათ მოითხოვონ სარეკომენდაციო წერილი პროექტის გაუმჯობესების შესახებ მხოლოდ ელექტრონული ფოსტის საშუალებით, რომელიც მათ გაეგზავნებათ 2020 წლის დეკემბრის ბოლო კვირაში.

IV ეტაპი: ტრენინგი სრული საპროექტო განაცხადის დასაწერად

ყველა განმცხადებელს, რომლებმაც გადალახეს პირველადი შეფასების ეტაპი, ექნება საშუალება გაიაროს შესაბამისი ტრენინგი ან კონსულტაცია (დისტანციურად ან პირისპირ), რომელიც მათ დაეხმარება სრული განაცხადის წარდგენაში. განმცხადებლის არყოფნის შემთხვევაში, დაიშვება მისი უფლებამოსილი წარმომადგენელი მინდობილობის საფუძველზე.

ბიზნეს პროექტების განმცხადებლებისთვის ხელმისაწვდომი იქნება შემდეგი სახის ტრენინგები:

1. მეწარმეობის ტრენინგი - ეს ტრენინგი მოგაწვდით ინფორმაციას ბუღალტრული აღრიცხვის სტანდარტების, საგადასახადო კანონმდებლობის შესაბამისი მოთხოვნების, იურიდიული რეგისტრაციის ფორმებისა და სხვა ვალდებულებების შესახებ, რომლებიც უნდა შესრულდეს საქართველოში ბიზნესის მიერ;
2. ბიზნეს გეგმის შემუშავების ტრენინგი_ ეს ტრენინგი მოიცავს ბიზნეს გეგმის შემუშავების, ბიუჯეტის და მარკეტინგული გეგმების შედგენის პრაქტიკულ მეთოდებს, ასევე, პოტენციურ მომხმარებლებზე წვდომის მარტივი მეთოდების დანერგვას.

თითოეულ ბიზნეს განმცხადებელს საკუთარ ბიზნეს გეგმასთან დაკავშირებით ექნება შესაძლებლობა, მოითხოვოს დაახლოებით 1 საათიანი ინდივიდუალური კონსულტაცია მოწვეულ ექსპერტებთან.

გარდა ამისა, სრული განაცხადების წარდგენამდე, ინდივიდუალური ან ჯგუფური საკონსულტაციო შეხვედრები გაიმართება იმ განმცხადებლებთან, რომელთა საპროექტო განაცხადის იდეაც ექვემდებარება კანონმდებლობით გათვალისწინებულ

სპეციფიკურ რეგულაციებსა და ნებართვებს (მაგალითად, სურსათის/ცხოველის საკვების უვნებლობის, ვეტერინარული და ფიტოსანიტარიული ნორმები და ა.შ.).

სათემო და საჯარო პროექტების განმცხადებლებისთვის ხელმისაწვდომი იქნება სრული საპროექტო განაცხადის შედგენის ტრენინგი, რომლის ფარგლებშიც განმცხადებლები ისწავლიან თუ როგორ დაწერონ სრული საპროექტო განაცხადი და გაივლიან ისეთ თემებს, როგორცაა დაინტერესებულ მხარეთა/პირთა ანალიზი, საჭიროებების შეფასება, ბიუჯეტის შედგენა, ასევე, პროექტის მდგრადობის და რისკების ანალიზი.

სრული სათემო საპროექტო განაცხადის მიღებისას, ყველა ტიპის განმცხადებელს (მათ შორის საინიციატივო ჯგუფებსაც) მოეთხოვება წარმოადგინონ საბოლოო ბენეფიციარების (მოსახლეობის) წარმომადგენლების ხელმოწერებით დადასტურებული წერილობითი დოკუმენტი, სადაც აღწერილი და დასაბუთებული იქნება, რომ პროექტი მიმართულია თემის რეალურ საჭიროებაზე.

საინიციატივო ჯგუფებმა უნდა წარმოადგინონ ხელმოწერილი დოკუმენტი, რომლითაც დასტურდება, რომ ბენეფიციარები (მოსახლეობა) თანახმაა უზრუნველყონ თანადაფინანსება (ხელმოწერათა რაოდენობა განხილული იქნება ინდივიდუალურად პროექტის სპეციფიკიდან გამომდინარე)

ტრენინგების და კონსულტაციების პარალელურად, განმცხადებლები დამოუკიდებლად მოამზადებენ სრულ საპროექტო განაცხადს და დადგენილ ვადებში გადააგზავნიან ელექტრონულ მისამართზე: lagtskaltubogrants@gmail.com; სხვა ფორმით გამოგზავნილი განაცხადი არ მიიღება.

V ეტაპი: სრული საპროექტო განაცხადის წარდგენა და შეფასება

სრული საპროექტო განაცხადის წარდგენა ხდება მხოლოდ იმ განმცხადებლების მიერ, რომელთაც წარმატებით გადალახეს პირველადი საპროექტო განაცხადების შერჩევის ეტაპი და გაიარეს რიგი ტრენინგები. ასეთ განმცხადებლებს სრული საპროექტო განაცხადის წარდგენის ვადების შესახებ ეცნობება სატელეფონო კომუნიკაციის საშუალებით „ფიფლ ინ ნიდის“ თანამშრომლებისაგან.

ტრენინგების შემდგომ, განმცხადებლები დამოუკიდებლად მოამზადებენ და წარადგენენ სრულ საპროექტო განაცხადს ელექტრონული ფორმით (დანართი 7, 9, 11 საპროექტო განაცხადის ტიპის მიხედვით), ელექტრონულ მისამართზე: lagtskaltubogrants@gmail.com. აპლიკაციის ფორმა უნდა იყოს შევსებული ნაბეჭდი ფორმით. (შენიშვნა: იწარმოება მიღებული დოკუმენტების სია და ყოველ განაცხადს მიენიჭება უნიკალური სარეგისტრაციო ნომერი).

განაცხადი გაეთიშება საგრანტო კონკურსს, თუ:

- განაცხადი წარმოდგენილია არასრულად;
- სწორად არ არის განსაზღვრული თანამონაწილეობის წილი;
- ბიუჯეტში „ფიფლ ინ ნიდისგან“ მოთხოვნილი თანხა 10%-ით და მეტად აღემატება პირველად განაცხადში მოთხოვნილ თანხას;
- საპროექტო განაცხადში ყველა მოთხოვნილი პუნქტი არ არის შევსებული და სიტყვათა მინიმალური რაოდენობა არ ემთხვევა მოთხოვნილს;
- თითოეულ პუნქტსა და ქვეპუნქტში წარმოდგენილი ინფორმაცია შეუსაბამოა სათაურთან;
- ბიუჯეტში შეტანილია დაუშვებელი ხარჯები;
- სავალდებულო დანართები/დოკუმენტები არ არის წარმოდგენილი (მაგალითად: მიწის რეგისტრაციის, ქონების დამადასტურებელი, ინვოისები და ა.შ).

შეფასების კომისიის წევრებს მიეცემა დრო, რათა წაიკითხონ საპროექტო განაცხადები, შეაფასონ ისინი ინდივიდუალურად და დადონ წერილობითი დასკვნა. შეფასების კრიტერიუმები გამომდინარეობს უკვე დამტკიცებული წყალტუბოს ადგილობრივი განვითარების სტრატეგიიდან (სრული საპროექტო განაცხადის შეფასების კრიტერიუმები იხილეთ დანართები 8, 10, 12, საპროექტო განაცხადის ტიპის მიხედვით).

აუცილებელია, საპროექტო განაცხადში ზუსტად იყოს მითითებული პროექტის შესაბამისობა „წყალტუბოს ადგილობრივი განვითარების სტრატეგიის“ პრიორიტეტებთან: „სტრატეგიული მიზანი“, „პრიორიტეტული ამოცანა“

კონკურსში მონაწილეობის გაგრძელებას შეძლებენ მხოლოდ ის პროექტები, რომლებიც მიიღებენ უმაღლეს შეფასებას. საჭიროების მიხედვით, ტექნიკური ექსპერტები პარალელურ რეჟიმში, ბიზნეს სექტორის საპროექტო განაცხადებზე მოამზადებენ ფინანსურ შეფასებას და შესაბამის რეკომენდაციებს პროექტების შეფასების კომისიისათვის.

შეფასების კომისიის გადაწყვეტილებით, მცირე ხარვეზების მქონე განაცხადის ავტორებს შესაძლებელია მიეცეს დამატებით რამდენიმე დღე განაცხადის სრულყოფისთვის.

განმცხადებელმა განაცხადის შევსებულ ფორმასთან ერთად უნდა წარმოადგინოს პროექტში აღნიშნული ქონების დამადასტურებელი დოკუმენტ(ებ)ი. მაგალითად: ამონაწერი საჯარო რეესტრიდან, იჯარის შემთხვევაში - შესაბამისი დამადასტურებელი დოკუმენტი, ოჯახის წევრის მფლობელობის შემთხვევაში - დროებით სარგებლობაში გადმოცემის დოკუმენტი და ა.შ.

ასევე, სავალდებულოა ყველა შესაბამისი დანართის წარდგენა.
არ განიხილება განაცხადი, რომელსაც არ ახლავს ყველა შესაბამისი დანართი.

დანართები:

- დანართი #1_ ორგანიზაციის წესდება (არსებობის შემთხვევაში);
 - დანართი #2_ მოძრავი ან უძრავი ქონების ფლობის დამადასტურებელი დოკუმენტაცია;
 - დანართი #3_ ხელშეკრულებები, წინასწარ შეთანხმების დოკუმენტები;
 - დანართი #4_ ლიცენზიები, ნებართვები, შესაბამისობის მოთხოვნები;
 - დანართი #5_ ექსპერტების დასკვნები;
 - დანართი #6_ ნახაზები, სურათები და ა.შ.
- სხვა დოკუმენტაცია, პროექტის სპეციფიკიდან გამომდინარე.

VI ეტაპი: შერჩეულ განმცხადებლებთან გასაუბრება და სავალდებულო მონიტორინგი

შეფასების კომისია ჩანიშნავს სპეციალურ შეხვედრას სრული საპროექტო განაცხადის ავტორებთან, რომლებიც ინდივიდუალურად წარადგენენ საკუთარ პროექტებს. პრეზენტაცია ღია იქნება საზოგადოებისათვის. ინტერვიუში მონაწილეობისათვის დამსწრეები უნდა დაემორჩილონ კონკრეტულ პროცედურებს. (მაგ. დამსწრეებს არა აქვთ უფლება გამოიყენონ მობილური ტელეფონები ინტერვიუს პროცესში.) განმცხადებლებსა და მათი ოჯახის წევრებს არ აქვთ უფლება დაესწრონ სხვა განაცხადის ავტორების პრეზენტაციებს. შეფასების კომისიის წევრებს შეუძლიათ დასვან დამატებითი კითხვები პროექტთან დაკავშირებით.

„ფიფლ ინ ნიდის“ ოფისის თანამშრომლები პარალელურ რეჟიმში შეაფასებენ საპროექტო განაცხადში აღწერილ, პროექტისათვის განკუთვნილ უძრავ და მოძრავ აქტივებს ადგილზე გასვლით, რის შემდეგაც წარუდგენენ შესაბამის რეკომენდაციებს პროექტების შეფასების კომისიას.

VII ეტაპი:

საპროექტო განაცხადების საბოლოო შეფასება ხდება ქულების სისტემის, ინფორმაციის შესაბამისობის, გასაუბრების საფუძველზე და საჭიროების შემთხვევაში პროცესში ჩართული დამოუკიდებელი ექსპერტის რეკომენდაციების გათვალისწინებით.

გამარჯვებული პროექტების შესახებ ინფორმაცია საჯაროდ იქნება გამოცხადებული. ყველას, ვისი პროექტიც არ დაკმაყოფილდება, შეუძლია მიიღოს წერილობითი დასაბუთება. საჯარო პროექტებს გადაწყვეტილების შესახებ ეცნობებათ 2021 წლის დეკემბერში. ხოლო ბიზნეს პროექტებს 2022 წლის თებერვალში.

- პროექტების მხარდაჭერა მოხდება უმაღლესი შეფასების და მოცემული კონკურსისათვის არსებული ფინანსური რესურსების გათვალისწინებით.

- თანაბარი ქულების შემთხვევაში, პრიორიტეტი მიენიჭება განცხადებებს, რომელთა ავტორებიც მუდმივად ცხოვრობენ წყალტუბოს მუნიციპალიტეტში.
- შეფასების კომისიამ შეიძლება შესთავაზოს გარკვეული ცვლილებების შეტანა მიღებულ საპროექტო განაცხადში.

გრანტის ზუსტი ოდენობა დამოკიდებული იქნება განაცხადთან ერთად წარდგენილ ბიუჯეტზე. აღნიშნული თანხის გადამოწმება მოხდება შეფასების კომისიის მიერ, რომელიც საჭიროების შემთხვევაში, კონსულტაციისთვის მოიწვევს ტექნიკურ და ფინანსურ ექსპერტებს. კომიტეტმა შესაძლოა განმცხადებელს მოსთხოვოს გაუმართლებელი ხარჯების შემცირება ან ამოღება, რათა განაცხადი აკმაყოფილებდეს პროექტის მიზნებს.

საგრანტო ხელშეკრულება და შესყიდვები:

- მხარდაჭერილი საპროექტო განაცხადის ავტორები „ფიფლ ინ ნიდის“ შესყიდვების ექსპერტებთან ერთად, ამზადებენ საჭირო დოკუმენტაციას.
- პარალელურად, ბიზნეს სექტორის მხარდაჭერილი საპროექტო განაცხადის ავტორები სამართლებრივად რეგისტრირდებიან (თუ ჯერ არ არიან რეგისტრირებული) და წარადგენენ სათანადო დოკუმენტაციას (მაქსიმუმ ერთი კვირის ვადაში).
- შემდგომ მხარდაჭერილი საპროექტო განაცხადის ავტორებთან გაფორმდება საგრანტო ხელშეკრულება.
- განმცხადებელი ახორციელებს საკუთარი ფინანსური თანამონაწილეობის ფარგლებში შესყიდვების პროცედურებს მხოლოდ საგრანტო ხელშეკრულების გაფორმების შემდეგ და შესაბამის ფინანსურ დოკუმენტაციას წარადგენს „წყალტუბოს ადგილობრივი განვითარების ჯგუფის“ ოფისში.
- განმცხადებლის მხრიდან თანამონაწილეობის ვალდებულების შესრულების დამადასტურებელი დოკუმენტების მიღების შემდეგ, განმახორციელებელი ორგანიზაცია დაიწყებს შესყიდვების პროცესს ბიზნეს და სათემო ინიციატივების/სამოქალაქო ჯგუფების განაცხადებისთვის „ფიფლ ინ ნიდისა“ და დონორების შესყიდვების რეგულაციების შესაბამისად ან გასცემს ფინანსურ ქვე-გრანტს საჯარო და იმ სამოქალაქო საზოგადოების აქტორებზე/ორგანიზაციებზე, რომელთაც აქვთ ადეკვატური ფინანსური კონტროლის სისტემები და მექანიზმები.
- „ფიფლ ინ ნიდის“ მიერ საგრანტო კონკურსის პირობებში გამარჯვებული პროექტების მხარდაჭერა მოხდება 2 გზით:
 - “ფიფლ ინ ნიდის” მიერ **საქონლისა და მომსახურების პირდაპირი შესყიდვა** (განსაკუთრებით, დანადგარები და მოძრავი აქტივები) და შემდგომ გადაცემა/დონაცია გამარჯვებული პროექტისათვის. ეს მიდგომა გამოყენებული იქნება ბიზნესის განვითარებაზე მიმართული პროექტების ქვეპროექტების (როგორც იურიდიული, ისე ფიზიკური პირებისთვის) მხარდაჭერისთვის.

- მესამე მხარისათვის ფინანსური გრანტის გადაცემის გზით - აღნიშნული გადაცემა ისეთ გამარჯვებულ პროექტს/განმცხადებელს, რომელიც შემდგომში სრულად იქნება პასუხისმგებელი სუბსიდირების სწორად ხარჯვაზე, საგრანტო ხელშეკრულების შესაბამისად, მისი ბიუჯეტის ჩათვლითა და პროექტის აღწერის გათვალისწინებით. ეს მიდგომა გამოყენებული იქნება საჯარო სექტორისა და სამოქალაქო საზოგადოების იმ წარმომადგენელთა პროექტების დასაფინანსებლად, რომლებსაც აქვთ ადეკვატური ფინანსური კონტროლის სისტემები და მექანიზმები. „ფიფლ ინ ნიდის“ ტექნიკური ექსპერტები შეაფასებენ გამარჯვებული განმცხადებლების ფინანსური მენეჯმენტის პროცედურებს და თითოეული შემთხვევის მიხედვით მიიღებენ გადაწყვეტილებას დაფინანსების ტიპის შესახებ.

ფინანსური გრანტის გადაცემა მოხდება რამდენიმე ეტაპად პროექტის სპეციფიკისა და მონიტორინგის ვიზიტების წარმატებულად დასრულების შემდეგ.

საჯარო და სათემო პროექტებისათვის შესაძლოა დაფინანსდეს სპორტული სტადიონების, გამაჯანსაღებელი და სათამაშო მოედნების რეაბილიტაცია და ა.შ.

მხარდაჭერილი პროექტების მონიტორინგი და მართვა

მხარდაჭერილი პროექტების მონიტორინგი განხორციელდება რეგულარულად, სულ მცირე 6 თვეში ერთხელ, „ფიფლ ინ ნიდისა“ და „წყალტუბოს ადგილობრივი განვითარების ჯგუფის“ მიერ, პროექტით დადგენილი მონიტორინგის გეგმის, კონკრეტული ბიზნეს განაცხადის ინდიკატორებისა და ბენეფიციართან გაფორმებული საგრანტო ხელშეკრულების მიხედვით. მონიტორინგის მიზანია პროექტის პროგრესის და ბენეფიციარის შემდგომი საჭიროებების შეფასება და მხარდაჭერა.

პროექტის მიმდინარეობისას (განხორციელებისა და მონიტორინგის დროს) ყველა სამართლებრივი და ფინანსური დოკუმენტი ხელმისაწვდომი უნდა იყოს შემმოწმებლისთვის.

პირდაპირი ბენეფიციარი აწარმოებს და წარმოადგენს რეგულარულ საბუღალტრო ანგარიშგებას, ახორციელებს ყველა საგადასახადო მოთხოვნას, საქართველოს კანონმდებლობის შესაბამისად. აღნიშნული დოკუმენტაცია ხელმისაწვდომი უნდა იყოს წყალტუბოს ადგილობრივი განვითარების ჯგუფის მონიტორინგის გუნდისთვის 3 წლის განმავლობაში. პროგრამის ფარგლებში მხარდაჭერილი პროექტები უნდა დარჩეს მოქმედი და ემსახურობდეს დასახულ მიზნებს განმცხადებლის მიერ შეთანხმებული პერიოდის განმავლობაში.

გამოცდილების გაზიარების მიზნით, „წყალტუბოს ადგილობრივი განვითარების ჯგუფის“ მოთხოვნის საფუძველზე, ბენეფიციარმა უნდა უზრუნველყოს თავისი საწარმოს/წარმოების ჩვენება ყველა დაინტერესებული პირისთვის, საგრანტო ხელშეკრულების ხელმოწერიდან მინიმუმ მომდევნო 3 წლის განმავლობაში.

„ფიფლ ინ ნიდის“ მიერ, საგრანტო კომპონენტის ფარგლებში გამარჯვებული პროექტისთვის შეძენილი ქონება პროექტის ავტორს გადაეცემა მიღება-ჩაბარების აქტით. მიღება-ჩაბარების აქტის მიხედვით, გადაცემული ნივთები/აღჭურვილობა ითვლება „ფიფლ ინ ნიდის“ საკუთრებად მონიტორინგის დასრულებამდე.

იმ შემთხვევაში, თუ მონიტორინგის ყველა ანგარიშმა გამოავლინა პროექტის წარმატებული მიმდინარეობა და არ დაფიქსირდა საგრანტო ხელშეკრულების პირობების დარღვევები, ბენეფიციარის დროებით სარგებლობაში მიღებული ქონება, დამატებითი ხელშეკრულების საფუძველზე, გადაეცემათ საკუთრებაში.

იმ შემთხვევაში, თუ მონიტორინგის შედეგად გამოვლინდა, რომ ბენეფიციარის მიერ არ სრულდება კონტრაქტით გათვალისწინებული პირობები, შესაძლებელია გადაცემული ქონება ჩამოერთვეს ბენეფიციარს და გაუქმდეს საგრანტო ხელშეკრულება. ასეთ დროს, აღჭურვილობა გადაეცემა სხვა პროექტის ბენეფიციარს.

აპელაციის პროცედურები

ყველა ინფორმაცია განაცხადზე მიღებული გადაწყვეტილების შესახებ მიეწოდება პერსონალურად განმცხადებელს. ყველა გამარჯვებული პროექტის შესახებ ინფორმაცია აიტვირთება „წყალტუბოს განვითარების ჯგუფის“ ვებ-გვერდზე.

იმ შემთხვევაში, თუ განმცხადებლის პროექტი ვერ მოხვდება გამარჯვებულ პროექტთა შორის, დაინტერესებულ პირებს შეუძლიათ მოითხოვონ სარეკომენდაციო წერილი, წარმოდგენილი საპროექტო განაცხადის მომავალში გაუმჯობესების მიზნით. თუკი დარღვეულია საკონკურსო პროცედურები, შეფასების ეტაპები არაა დაცული და პროექტი შეფასებული არაა საგრანტო სახელმძღვანელოში მოცემული კრიტერიუმების შესაბამისად, აპლიკანტს შეუძლია, წერილობითი ფორმით მიმართოს „ფიფლ ინ ნიდის“ პროექტის მენეჯერს. პროექტის მენეჯერი დამატებით მოიძიებს ინფორმაციას და „ფიფლ ინ ნიდ“ მიიღებს გადაწყვეტილებას პროექტთან მიმართებით შემდგომი ნაბიჯების შესახებ. ფაქტობრივად დაუსაბუთებელი გასაჩივრების შემთხვევაში აპელაციის პროცედურები არ განხორციელდება.

ნებისმიერი მოსაზრება ან შენიშვნა, რაც უკავშირდება შერჩევის პროცესს შეიძლება გაგზავნილი იქნას „ფიფლ ინ ნიდ“-ის საქართველოს სათაო ოფისში შემდეგ მისამართზე: საქართველო, თბილისი, 0105, გ. ქიქოძის ქ. #16, ან გაიგზავნოს ელექტრონული ფოსტით: feedback.georgia@peopleinneed.cz

ბენეფიციარების შესაძლებლობების ზრდა:

საგრანტო კონკურსში მონაწილეობის შემდეგ წარმატებული განმცხადებლები

მიიღებენ მათ საჭიროებებზე მორგებულ შესაძლებლობების ზრდის აქტივობებში მონაწილეობის შეთავაზებას.